

Բիւրօի նախաձեռնութեամբ, ապր. 7-8-ին, Ալեքսանդրապոլում դումարեց, մի տեսակ, համազգային խորհրդաժողով, որին մասնակցեցին Ազգ. Խորհրդի և Ապահովութեան Խորհրդի անդամները, Սէյմի և Տրապիզոնի պատւիրակութեան հայ պատգամաւորները, քաղաքական կուսակցութիւնների, տեղական ազգային խորհուրդների, հասարակական կազմակերպութիւնների, Երեւան, Ալեքսանդրապոլ ու Կարս քաղաքների ու բանակի ներկայացուցիչները, և մի շարք հասարակական գործիչներ: 1917թ. սեպտեմբերի ազգային խորհրդաժողովից յետոյ հայկական ամենապատկառելի և պատասխանատու հաւաքոյթն էր այս, որ պէտք է որոշէր հայերի վարքագիծը պատերազմի և խաղաղութեան հարցում: Ներկայ էին բազմաթիւ պատասխանատու գործիչներ — Արամը, զօր. Նաղարբէղեանը, զօր. Սիլիկեանը, Գրօն, Ա. Ահարոնեանը, Ս. Յարութիւնեանը, Մ. Պապաջանեանը, Յ. Քաջազնունին, Ա. Խատիսեանը, Ա. Սահակեանը, Ղ. Տէր-Ղաղարեանը, Ա. Երզնկեանը, Ս. Մանասեանը, Ռ. Տէր-Մինասեանը, Վահ. Փափազեանը, Ստ. Մամիկոնեանը, Տ. Բէզգաղեանը, Ն. Աղբալեանը, Երեւանի ու Կարսի քաղաքապետները և այլն:

Պատերազմի և խաղաղութեան մասին դրաւոր գեկուցում կարդաց Յ. Քաջազնունին, որը, իրեն յատուկ տրամաբանական կուռ բանաւարութիւններով, աշխատում էր համոզել թիւրքական պայմաններին համակերպելու անհրաժեշտութիւնը: Զեկուցումը առաջ բերեց յուզումնալից ու երկարատև վիճարանութիւններ: Հաշտութեան կողմնակիցների թիւը մեծ չէր — Յ. Քաջազնունի, Մ. Պապաջանեան, Ղ. Տէր-Ղաղարեան և մի քանի ուրիշներ: Ահագին մեծամասնութիւնը ժողովականների, բանակի ներկայացուցիչներն ու հրամանատարութիւնը ոչի ի բուն պաշտպանում էին թիւրքական պահանջները մերժելու և պատերազմը շարունակելու անհրաժեշտութիւնը\*):

Թիֆլիսից ստացուող լուրերը, սակայն, քիչ էին ներդաշնակում Ալեքսանդրապոլի տրամադրութիւններին: Հաղորդում էին, որ Անդրկ. Կառավարութեան թուրք նախարարները վերջնազէր են ներկայացրել պահանջներով անյապաղ ընդունել Բրեստ-Լիտովսկի պայմանները և կնքել հաշտութիւն, այլպէս իրենք կը հեռանան Սէյմից ու կառավարութիւնից: Զխնկելիին, կատարուող դէպքերի օգնութեամբ, յաջողւել էր համոզելու իր ընկերներին՝ ընդունել թիւրքերի պայմանները: Այդ պատճառով, Ալեքսանդրապոլի խորհրդակցութիւնը, առանց որոշ վճիռ հանելու, թէև մեծամասնաբար դէմ էր թիւրքերի պահանջներն ընդունելուն, ցրեց՝ յանձնարարելով իր անդամներին լուծել խնդիրը Թիֆլիսում, ուր կացութիւնը աւելի պարզ էր:

Թիֆլիսում, սակայն, ամէն բան արդէն որոշւած էր. վրացիներն ու թուրքերը վճռել էին՝ վերջ տալ պատերազմին, ընդունել թիւրքական

\*) Այս ժողովին մասնակցեց և հայ բոլշևիկ Պ. Մակինցեանը, որը, Արամի յանձնարարութեամբ, Երևանից գնում էր Մոսկա՝ յաջողացնելու համար վերջինիս աջակցութիւնը հայ ժողովրդին: Մակինցեանը անցաւ Ռուսաստան և փոխանակ կատարելու իր խոստումը՝ պաշտօնի մտաւ Զեկայի մէջ և միւս հայ բոլշևիկների հետ սկսեց կատաղի պայքար մզել Հայաստանի Հանրապետութեան դէմ: